



15. Oktober 2019

UKA 2019/43 - 103
Aqqalu C.Jerimiassen

Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiititaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliaasaasut aallaavigalugit allaffissornerup annertussusaa ataatsimiititaliarsuup nalilersussavaa, suleriaatsit sunniuteqarluarnerusut pilersinnissaannut immikkoortortaqarfillu suliaasaqarfillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviusaaq. Ataatsimiititaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiititaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna ataatsimiititaliarsuup innersuussutai Inatsisartuni politikikkut suliarineqassapput.

(Inatsisartunut ilaasortaq Peter Olsen, Inuit Ataqatigiit)

Immikkoortuni Namminersorlutik Oqartussat kommunillu akuuffigisaanni marloqiusamik allaffiossornerup pinngitsoortinneqarnissaanut, ataatsimut suleriaatsit pisariillisarnissaannut isumalluutillu avitseqatigiissutigineqarnissaannut periarfissat qulaajaaffigalugit Naalakkersuisut nassuiaammik UKA2021-mut saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Suleqatigiissitsisut)

Pisortat ingerlataasa ataani sulineq ullumikkut annikitsuinnaanngitsutut oqaatigineqarsinnaaqaq, tassami imm.43-mik siunnersuuteqartoq, Peter Olsen (IA) eqqaasilaariarukku immaqa, Qaasuitsup Kommunerisimasaani sulisoqarnermut misissuineramik inernerit kommunalbestyrelsiusimasumut saqqummiuneqarnikuusuni takuneqarsinnaammat, pisortat ataani namminersortunilu sulisut agguataarneqarsimaneri procentinngorlugit kisitsisinngorlugillu.

Taamanikkummi kommuniusimasumi inoqarfiit annerit arfineq-pingasut ataatsimoortereernerini takuneqarsinnaammat, sulisuusuni 82%-ingajalluinnaat misissuinermi pisortat ataani suliffeqartuusut.

Taassuma kisitsisip takutikannereersinnaajunnarsivaa nunatta sinnerani allaanerungaartoqarunnangitsoq.



Taamaattoq isumalioqatigiisitamik pilersitsinissaq qanoq aaqqissuunneqarsinnaanera soqutiginaateqarsinnaavoq nalilersorniassallugu. Tassami pissutsit sungiusimallualersimasagut imaaliannaq qimaannarsinnaaneq sapertaratsigit immaqalumi takujuminaatsilersimasinnaallugit nalinginnaasorivallaalerlugit.

Soorlumi assersuutigeriaraanni suliatta ilai nalunngippallaalersimagaangatsigit nassuiaasiorniartuulertarpugut paasiuminaassinnaasumik naatsorsuutigereerluguttaaq saqqummiussiffigisatta paasissagaa. Torralataasorinarsinnaavorlumi taamaammat saqqummiunneqartumi inuttalersuinissamik eqqarsaateqarnermi agguarluarlugit inississuinissamik siunnerfeqarneq.

Tamanna pillugu isuma Atassummiik soqutiginaateqartipparput, taamaallaalli ataatsimiitsitaliarsuarnik ingerlatsinerit maanna imaaginnavimmata arlaat atorunnaarseriarlugu akissamik pissarsisinnaangaanni orniginarnerutillugu.

Aammattaarmi eqqarsaatigasassarigatsigu, sulisut toqqissillutik sulisinnaasariaqarput, imaanngitsoq ersiussasut ikilisaapiloorujussuarnermi eqqorneqariataaratarsinnaanermut.

Taamak Atassummiik oqaaseqarluta toqqaannartumik akuersinermik naaggaarnermilluunniit nipeqartinngikkaluarlugu, ataatsimiitsitaliami eqqartorluarneqarnissaa pisariaqarsorivarput.